

四庫全書

史部

欽定四庫全書

史部

皇朝文獻通考卷五十五

內閣中書_臣實汝翼覆勘

總校官中書_臣孫溶

欽定四庫全書

皇朝文獻通考卷五十

選舉考四

舉士

乾隆元年議准會試與順天鄉試內簾主考同考官除同姓無服者與郎舅中表等戚不必迴避外其有服之同姓與翁婿甥舅皆令迴避不行開出者單職

奉

特旨考試迴避卷自雍正二年暫行之後不著為例至是禮部奏請今科會試其內外簾執事官員子弟應否准令一體考試將試卷另封進

呈得

旨內外簾官子弟應行迴避者著另行考試乾隆元年會試及鄉試恩科准於常額之外寬餘取中以示鼓勵其作何另行考試出榜之處著禮部速行妥議具

奏尋議迴避子弟應請仍於闈中一體考試另編坐號歸於一處以便稽查其試題會試由禮部堂官鄉試由順天府府尹先期奏請

欽定四書三題於初八日密封轉交場內刊刻給散經題及二三場仍用闈中之題一體考試至彌封之後另編字號滿洲蒙古漢軍卷面上俱列旗字其餘各省分照鄉試之例於卷面上分別南北字樣禮部奏派大臣校閱所取試卷恭候

欽定於出榜之前發會試由禮部堂官鄉試由順天府
府尹捧入場內轉交內簾主考官酌量名次叙入
榜內

又兵部尚書傅鼐奉

諭旨朕聞今科會試遺卷內尚有佳卷今場事已竣應
如何加恩增中爾可會同大學士鄂爾泰朱軾議奏
尋議請派大臣再行校閱揀選進

呈又奏請今科會試各省年老舉人八十歲以上劉

振起等三人七十五歲以上馬應龍等五人七十歲以上李琬等十五人七十歲宋士正等二十人謹繕清單請將各卷查閱有可入選者檢出進呈並得

旨報可大學士鄂爾泰等遵

旨校閱會試闈中未經取中之薦卷擇其尚可續取者共計三十卷暨年老舉人試卷內選出五卷一并進

呈奉

諭旨交禮部照所擬名次出榜

又禮部議准繙譯科鄉會試題於欽奉

諭旨內選擬日久易於重複嗣後繙譯鄉會試令主考
於性理精義及小學內選擇數行俱不得過三百
字密封進

呈恭候

欽定為題其考試生員並於性理小學內出一題考試

其蒙古繙譯科鄉會試及考試生員亦於清文性
理小學內照例出題但以繙譯性理小學坊間廣
有若平時記誦或懷挾抄寫以圖僥倖則士子不
知究心文理終於繙譯未能精通殊非拔取真才
之意嗣後繙譯鄉會試主考會同房官於性理精
義小學每一題後括其大義總論數語令士子一
同繙譯

又禮部奉

諭旨雲南貴州廣東廣西四川福建六省舉人赴京應試未經中式者著照雍正十一年之例揀選奏聞其上次記名二十一人一併入於此內請旨旋於五月

內引

見發往各省以知縣試用再行題請實授以主事用者一人以教職用者四人

又奉

諭旨今歲八月舉行恩科鄉試其正副考官必人品端

方學問醇正者始足膺衡鑒之寄朕即位之初不能
深知諸臣之底蘊著張廷玉鄂爾泰朱軾徐本邵基
任蘭枝徐元夢福敏孫嘉淦楊名時於翰林科道部
屬內各據所知多舉數員於五日內交送內閣彙奏
候朕考試簡用庶得才品兼優之員以副掄才之典
嗣經考試一二等人員皆引
見記名兼以道府同知補用數員

又准捐納候選之貢監得與鄉試舉人得與會試

又奉

諭旨向來進士候選但於雙月銓補嗣因人多壅滯准於單月亦立班選用近來進士已經疏通不過需次二三年即可得缺惟舉人選班壅積日久現今猶需次至二十年方可得缺以致中年登科者至精力就衰之時方膺民社難收實效朕思進士已經疏通應仍照舊例但於雙月銓補其進士單月班次應改用舉人銓選亦屬疏通舉人之一法交吏部查議尋議

銓選舊例知縣員缺雙月用進士五人舉人五人
捐納四人推陞三人單月用應補四人捐納四人
舉人四人續於雍正二年九卿議覆原任侍郎沈
近思條奏進士選用知縣止於雙月十七缺內選
用五人往往候至十餘年尚多壅滯請將進士入
於單月分內選用四人叙於舉人之前以十六缺
為一班照科分名次銓選近年進士已得疏通惟
各省舉人每科中式者必待二十餘年方可得缺

未免壅滯臣等悉心酌量現在癸丑丙辰進士候選知縣者已有四百餘名且丁巳年

恩科會試在邇候選進士為數亦復不少若將進士單月班次改為舉人銓選則一年內所用進士不過二十餘名恐積至數年後又未免於壅滯查銓選知縣班次雙月用捐納四人單月用捐納四人今捐納條例已經奉

旨悉行停止雙單月捐納知縣為數無多請嗣後現在

雙單月捐納人員不敷班次之數即以舉人抵補
一二年間捐納人員用完之後則捐納班次盡歸
舉人選用總計雙月知縣十七缺之內舉人可選
用九缺單月十六缺之內舉人可選用八缺如此
則舉人選用知縣已倍於進士自可及時効用於
銓法既得均平而科甲兩途俱無壅滯矣從之
加年老下第舉人以國子監助教學正及內閣中
書職銜

又議准順天鄉試四字號分南四北四中四字號
取中順天鄉試除北四南四字號照舊額各取三
十九名外其雲南貴州四川廣西另編中四字號
十五名取中一名如零數過半者亦准加中一名
如人數不及十五名仍附入南四無庸另編中四
字號

臣等謹按順天闈中分編字號名目以辨省分曰
貝字號則直隸之生員也曰北四字號則奉天直

隸山東山西河南陝西之貢監生也曰南皿字號
則江南江西浙江福建湖廣廣東之貢監生也曰
中皿字號則雲南貴州四川廣西之貢監生也曰
夾字號則奉天是也曰旦字號則宣化是也曰鹵
字號則天津商籍之赴試者也而山東省闈中有
耳字號則孔顏曾孟四氏也陝西省闈中有丁字
號謂寧夏府也有聿字號謂甘肅也福建闈中有
至字號謂臺灣也於試卷送入內簾時畫疆分界

因地取材以平解額庶不致豐茲嗇彼贏絀懸殊
有得失偏枯之患也

又定揀選

咸安宮教習例向例

內廷教習將考取之新進士與恩拔歲副貢生分缺
間補至是議准

咸安宮教習應於新科進士內傳問有願充內官學
教習者令其報名禮部會同吏部揀選引

見陸續充補三年期滿該總管將稱職之員分別等第
引

見或授為主事或授為即用知縣恭候
欽定乾隆二年奏准嗣後

咸安宮漢教習仍於新進士內加以考試選用如新
進士不敷用於明通榜舉人及各省舉人內考取
咨送充補其所選進士俟三年期滿詳加分別等

第帶領引

見咨部仍照禮部原議以主事知縣即用舉人以知縣
教職即用

定博學鴻詞試題之例吏部議覆御史吳元安奏
言薦舉博學鴻詞原期得湛深經術敦崇實學之
儒始足副淹雅之稱膺著作之選蓋詩賦雖取兼
長而經史尤為根柢若徒駢綴儷偶推敲聲律縱
有文藻可觀終覺名實未稱應如該御史所請考
試博學鴻詞定為兩場首場試以經解一篇史論

一篇二場照例試以詩賦論三題皆許自辰至酉
夜則准其繼燭以盡其長疏上如議行

又禮部揀選八旗直隸各省拔貢生一百四十四
名引

見分別錄用知縣佐貳教官

又考試博學鴻詞

欽取十五人分別選授翰林院官先是雍正十一年四
月奉

諭旨朕惟博學鴻詞之科所以待淹通之士俾之膺著作之選備顧問之任

聖祖仁皇帝康熙十七年薦舉博學鴻詞名試授職迄今數十年來未嘗廣為搜羅以示鼓勵朕延攬維殷闢門額俊敦崇實學諭旨屢頒宜有殫見洽聞足稱博學鴻詞之選者所當特修曠典嘉與旁求在京著滿漢三品以上各舉所知彙送內閣在外督撫會同該學政悉心體訪遴選考驗保題送部轉交內閣朕將臨軒親試優

加錄用至是內外諸臣保薦陸續到部凡考試事宜俱如康熙十八年例經大學士鄂爾泰等奏請考取一等五名授以翰林院編修二等十名內由科甲出身者授以翰林院檢討未經中舉者授以翰林院庶吉士奉

諭旨依議次日帶領引

見劉綸潘安禮諸錦于振杭世駿俱授編修陳兆崙劉藻夏之蓉周長發程恂俱授檢討楊汪度沈廷芳

汪士鐸陳士璠齊召南俱授庶吉士次年又補試博學鴻詞一名二等三名萬松齡張漢授為檢討朱荃洪世澤授為庶吉士

二年吏部議准御史程盛修奏言翰林地居清切所以備顧問司紀載任綦重也然欲得通才務端始進自保舉之例行而呈身識面廣開請託之門額手彈冠最便空疎之輩臣愚以為亟宜停止查近科以來新進士於榜後先令九卿保舉然後帶

領引

見選用庶常原為慎重之意但新科進士俱係未經出仕之人九卿等原不能深知不過就其有志讀書堪以造就者即行舉出行之既久其中或有冒濫亦未可定應如所奏嗣後新進士停其保舉從之又吏部議准御史程盛修奏請停榜後額外主事之用以杜冗濫查向例新進士引

見時除選用庶吉士外其餘俱歸吏部以中書知縣等

官銓選嗣奉

特旨分發各部令在額外主事上學習行走現在各部
主事之學習者甚多銓補未免壅滯應如所請嗣
後新科進士除選用庶吉士外俱令歸吏部以應
得之官按班次銓選無庸分發各部從之

又以恭逢

恩詔凡貢生監生每年仍派大臣官員考定職銜照舊
例送吏部註冊

又奉

諭旨汪漈所奏考試新進士時應令其將本處當行之
事各據所見明白陳奏王大臣等議以歷科考試進
士具有成式無庸更張朕思古來帝王為治不棄芻
蕘況伊等既成進士皆係讀書之人於地方利弊或
有確見亦未可定今年考試進士仍照舊例出題若
伊等有願將地方事件敷陳者准其據實條奏閱卷
大臣等擇其言有可採者進呈朕覽

又奉

諭旨滿洲進士選授庶常向例俱學習漢書去年因徐元夢條奏滿庶吉士復令分習清書朕思滿語係滿洲自幼所習只須漢文通順人人皆能繙譯且受職之後自可令辦繙譯之事清文亦不致荒廢何必於選館之時專令學習乎嗣後滿洲庶吉士習清書之例著停止

又奉

諭旨從前

世宗憲皇帝軫念八旗滿洲蒙古漢軍前鋒護軍另戶領
催披甲間散內有能繙譯及繕寫清書之人例不准
考無有進身之階承

特降恩旨考試著交吏部照前考試內有最優者揀選具
奏請旨

三年

上詣太學行釋奠禮大學士鄂爾泰等奉

欽定四庫全書

諭旨觀禮三十一人俱准入監讀書國子監本科鄉試
照雍正二年例廣額十八名

又議定繙譯鄉會兩試

欽命繙譯一題外再於清文書內

欽命一題令士子作清文一篇其試題仍照例由正副

主考官選擬數條密封進呈恭候

欽定其清文體式照依漢文論體

又奉

諭旨朕聞各省現任教職若中進士現任訓導若中舉人副榜則有應用之缺便離原有之任以待銓補而銓補往往遲延動輒數載是一中之後轉令退居閒散矣推求其故蓋以從前品級相懸故定例令其離任今教職品級既已加增則離任之例亦應酌量變通以示鼓勵嗣後現任教諭會試得中進士例應歸班者仍令回原任以教授銜管教諭事現任訓導鄉試得中舉人副榜者仍回原任以教諭管訓導事若

遇該員本班應選時仍照常銓選遇卓異薦舉亦照銜陞轉將此永著為例

又大學士伯鄂爾泰等奏臣等衙門滿洲中書每旗額設九員八旗共七十二員內分隸滿本房四十員專司繕寫清字

上諭勅書奏摺本章各

壇廟祝版及匾額碑文分隸漢本房三十二員專司繕譯上諭奏摺本章滿漢本房事務繁多額設中書不敷應

用是以屢經諸臣條奏滿本房增設貼寫中書二十四員例由臣衙門會同吏部堂官於貢監生員官學生義學生內考試能清字者補用漢本房增設貼寫中書十六員例由臣衙門會同吏部堂官於繙譯記名人員內考試能繙譯者補用至滿漢本房中書缺出即於滿漢本房貼寫中書內挨次補用今吏部以文舉人繙譯舉人及各部院筆帖式陞遷壅滯請於每旗中書九缺內分出四缺按

旗論俸補用文舉人及繙譯舉人出身之筆帖式
其餘五缺仍用貼寫中書其貼寫中書缺出停其
考取貢監生員官學生義學生人等於各部院現
在有品級筆帖式并閒散文舉人繙譯舉人內揀
選咨送內閣會同該部堂官選補查得滿漢本房
中書所司之事關係緊要若不考試清字繙譯只
按旗論俸挨次補用恐才不稱職轉致有悞臣等
請將應用旗分之文舉人繙譯舉人出身之筆帖

式公同揀選能繙譯繕寫清書用為滿本房中書
能繙譯者用為漢本房中書如此則仍於吏部原
奏相符而補用人員各稱其職從之

又吏部奏舊例各項貢監生考職於每年四月內
投文五月內考試續因各省考職人數甚少間有
遲至二三年考試一次者嗣後應請於鄉試之年
仍照舊例定期於五月內考試行令各省督撫如
有情願赴考貢監生給咨務於三月內到部則各

省赴考貢監既有定期可免守候之虞矣從之

又大學士伯鄂爾泰議覆御史程盛修奏請中式進士之京官歸班銓選一條查七品以下京官中式進士或以內用或以知縣即用者該衙門即移會吏部開缺其歸班選用者仍留原任之處尚未著有定例應如該御史所奏嗣後七品以下京官中式進士除選授庶常外俱令仍留原任從之又奉

諭旨武英殿寫字需人著尚書趙國麟等在國子監肄業之正進貢生內看其年力精壯字畫端楷情願効力者選取十人送武英殿以備謄錄繕寫之用俟行走數年該管王大臣秉公具奏酌量議叙

四年陝西學政嵩壽奏歲科兩試於四書經義外摘錄本經四五行令生童作講義一段以定優劣如童生中有能背誦五經兼能講義者書藝即屬平通亦量行錄取以示鼓勵得

旨允行

定補行

殿試例監察御史霍備奏補行

殿試人員應將試卷一體進呈

御覽毋庸分別從之

又奉

諭旨向來新科進士於殿試之前有呈送頌聯之陋習
近來此風又覺漸熾夫士子進身之始即從事於請

託奔競則將來服官尚安望其有所樹立以備國家之用而大臣等亦宜精白乃心絕請託之私為國家培正材該部出示曉諭嚴加禁止倘有違旨仍蹈故轍者經朕訪聞或科道官叅奏必將與受之人一體從重治罪尋以士子進身之始即習為獻諛之詞尤非導之以正古人對策中無此體裁

殿試之期

上親製策問試題不拘舊式以免諸生預先揣摩諸生

策內不許用四六頌聯但取文理明通敷陳切當
不必泥於成格限於字數因此次試期已近倘有
不畫一處亦不以此為去取

又

賜繙譯人員進士出身以主事等官分別錄用先是禮
部題准繙譯鄉試已歷六科文舉人能繙譯者亦
准入場人數衆多請於乾隆己未年八月舉行會
試其會試事宜照題定則例辦理請派御史四員

專司巡察至是取中繙譯進士滿洲二十名蒙古
二名奉

諭旨今年繙譯會試取中二十二人雖從前有照例殿
試之議但此科人數甚少不必舉行殿試俱著賜進
士出身吏部帶領引見候朕酌量錄用其優者以六
部主事即用次者在主事上學習行走該堂官照例
題補又次者照滿洲進士例選用內有現任者即在
任候陞不必出缺

六年奉

諭旨滿漢進士原屬一體嗣後滿洲進士亦著照依甲第名次選用知縣俾其漸悉民瘼學習外任之事

又奉

諭旨科場懷挾之弊例禁甚嚴今鄉試在邇聞得外間不肖士子故智復萌預先賃倩善寫細字之人鈔錄文藝為入場夾帶之具若不嚴行禁止則僥倖獲售者必多而真才轉致黜落於掄才大典甚有關係著

步軍統領五城御史出示曉諭並密行查拏至入場之時監試御史等必須嚴加搜檢不可虛應故事臨期朕或另遣人看視倘有寬縱疎漏之弊必將該管官員從重議處

又定順天鄉試同考分校例先是給事中朱鳳英奏請順天鄉試同考官照會試分省迴避之例北籍祇閱南卷南籍祇閱北卷經部議以房官南北籍人數不一分閱之卷多寡不齊難以均派未便

准行茲奉

諭旨部議祇將南北二區較論固難分派若將通場滿
漢生員貢監各卷併數合算自無不均之處且立法
必期無間而防範不嫌過周與其留滲漏以滋弊端
無寧嚴界限以絕物議嗣後順天鄉試同考官南省
人概令迴避南區卷北省人概令迴避北區卷邊省
人概令迴避中區卷滿洲漢軍概令迴避滿字合字
卷如此分別可以清弊竇而息浮議亦防微杜漸之

道也

七年奉

諭旨國家於科目取士之外又有拔貢一途所以收未盡之人材以廣備用之數也我朝教澤涵濡人文日盛又復屢開恩科加添中額是以所取進士濟濟多人而舉人皆日積日衆竟有需次多年而不得一官者此亦事勢之必然無足怪者朕為此時厯於懷屢籌疏通之策若又添取拔貢以分其缺數年一次舉

行則人愈多而缺愈少舉人銓選更遙遙無期矣朕
思拔貢乃係生員中之優者夫既為文學華瞻之清
衿則應科舉時自可脫穎而出又不專籍選拔以為
呈身之路也查從前選拔或數十年一舉或二十年
一舉今則六年一舉為期太近理應酌量變通嗣後
著定為十二年選拔一次永著為例再者各省應試
生員貢監由學臣錄送入場向例每舉人一名額取
科舉三十名嗣後加至一百名亦不為不多矣且學

臣等博寬大之名於科舉之外遺才大收一概錄送
且有督撫好行其德普收送考者以致文理荒疎之
人皆得濫冒入場試卷太多不但於試官倉猝之中
難於別擇即浮薄之士子將以觀光為游戲而不復
攻苦於寒牕於賓興大典甚有關係嗣後學臣各宜
留心慎重辦理毋得濫濫永著為例

又大學士等奏本月考選中書請派閱卷大臣四
員照吏部考試貢監例咨行都察院派滿漢監試

御史二員臣等派侍讀典籍各一員俱先一日同閱卷大臣入貢院請題散卷扃試至一切供應人役物件并令順天府備辦事竣報銷從之

八年奉

諭旨考取之宗室玉鼎柱達麟圖福喜俱准作進士與乙丑科會試中式之人一體殿試引見或選入翰林或以部屬等官補用候朕臨時降旨嗣後俱照此例行

又准八旗進士考試教習滿洲文進士繙譯進士
向無考試八旗教習之例至是禮部奏請准其一
體考試

又奉

諭旨朕聞修書各館謄錄人員內竟有不能繕寫之人
夤緣而進及上館之後轉行倩募以致承修各書不
能刻期告竣夫國家開館纂修典制綦重書成之日
謄錄人員亦有議叙錄用之例何得將不能繕寫之

人濫行充補從前滿洲繙譯謄錄亦由各館自行挑補後御史觀音保條奏請簡派大臣考試選取送館經部議行嗣後各館漢謄錄需人亦應另派大臣秉公考取送館錄用下部定議嗣後各館需用漢謄錄人員亦照考取滿洲繙譯謄錄人員之例將舉人恩拔副歲貢生及捐納貢監情願考試者行文禮部國子監送部考取挨名頂補

九年監察御史錢度奏貢監考職向例不論文字

優劣盡行錄取殊為未協請

勅下考試大臣務擇其文理優通者酌量錄取寧少無多永著為例從之

又奉

諭旨向來主考同考官之子俱令迴避雍正年間准其一體應試亦未著有定例朕看來各科迴避生多寡不一若過人少之年則入彀甚易於科場條例亦不盡一嗣後不必一體考試

又奉

諭旨順天府尹蔣炳條奏外省覆試一事朕已降旨允
行但如何覆試之處未曾奏及各省難以奉行科場
取士首重四書文士子之通與不通總不出四書文
之外應令該督撫會同學政出間冷二題當面考試
聽其盡一日之長試畢即將原卷與中式卷一併解
部聽候磨勘

又

命減直省中額十分之一

十月

上幸貢院周覽號舍賦詩四首

翰苑瓊筵酌令辰
棘闈來閱鳳城闈
百年士氣經培
養寸簷簷風實苦辛
自古曾聞觀國彥
從今不薄讀

書人白駒翮羽傳周雅
佐我休明四海春
盡道文章接上台
菁莪樂育濟時才
千秋得失非虛
也咫尺雲泥亦幻哉
若有淚眶啼桂落
那無笑口對

花開鳳池多少簪毫者都向龍門燒尾來

萬里扶搖正翮搏飛龍利見豈為干志賢聖志應須
立言孔孟言大是難見說經綸推國士從來桃李屬
春官但令姓氏朱衣點那惜三條燭淚殘

周遭闡棘院沉沉景物當前總入吟才擬珪璋方特達
文歸雅正薄艱深禹門魚變辭凡水喬木鶯遷出故
林寄語至公堂裏客莫教冰鑑負初心

臣等謹按禮部有貢院自唐開元始我

朝鄉試由

京師至各省為試院凡十有五而

京師首善之地且天下人文所會集也每當貢舉之期恭請

欽定試題鄉試則順天府尹會試則知貢舉官恭捧黃
匣扁鐫封識甚嚴至聚奎堂門外考官跪接以進
仰

黃封之下貢不啻咫尺

天顏已為榮幸自古迄今未聞有

親幸試院

賦詩題壁俾海內窮簷白屋之士咸得仰誦

天章撫臨而慰勉之者惟我

皇上右文養士壽考作人自翰院

賜宴羣臣

鑾輅迴鑣

駕臨貢院親灑

宸翰賦詩四章勗多士以志聖賢之志言孔孟之言從
此海宇士子當風簷握管時凜然謹遵

聖訓皆時有重規疊矩在其心目間夫鈎章棘句既非
承平雅頌之音而縟絲膚詞亦乖先正清真之義
屢蒙

諭旨諄諄又

欽定四書文為之正鵠撒棘以還即加磨勘然後知體
會聖賢語氣之難誠有如

御製詩中所示者近年以來鄉會試卷稍知檢束爭自濯磨皆我

皇上御製鴻章有以感動警發持斯文之風會潛移密運不知其然而然彼夫九轉丹成三條燭盡唐人篇什載之通考中豈得與

咸英韶濩之音卿雲紉縵之辭相比儷哉臣等編次所及謹拜手稽首而敬志之

勅文武鄉會試外考取中書筆帖式謄錄教習及貢監

考職俱於午門考試

十年奉

諭旨三載賓興國家舉賢右文之大典必諸弊悉去然後可以拔取真才所謂稂莠不剪則嘉禾不生其理顯然歷來查弊之法不得不嚴者此正慎重科名厚待良士之道昨歲朕親臨貢院遍觀堂所周覽號舍矮屋風簷備極辛苦深可軫念比賦四詩令刊堂壁可以知朕心矣今歲會試已展期三月以待春溫嗣

後即以爲例茲特預降旨命禮部侍郎楊錫紱知貢
舉俾得先期計議從容料理楊錫紱可仰體朕心當
嚴則嚴當寬則寬於釐剔弊端之中寓優恤士子之
意二者相成不相悖也即如蠟燭一事因有燭中夾
帶之弊是以改爲官給若向舉子多索價值則不可
或蠟少而蠟質不堅則更不可朕姑舉一節以類其
餘知貢舉者其善爲之尋以搜檢懷挾例去皮衣襖
襲而會試風簷之下非衣裘不足以禦寒停止皮

衣去面氈衣去裏之例

停止榜後揀選舉人例先是大學士九卿等定議於每科會試發榜之後揀選年力強健質地明白者列為一等以縣令用若年力精神堪司教職者列為二等以正諭銓選其應用訓導者與歲貢分缺選補至年力衰邁者以應得之缺休致奉

諭旨人材難以預料若一經驗看即為定衡則入選者焉保其必稱循良更恐逾時或又不堪任用況才具

尚不能一望而知而心術又豈能外觀即定所可知者不過年歲狀貌耳與其定於數年之前不若審於選官之日今當會試之年士子雲集初次揀選人數必多恐汰除者衆此等舉子未免絕其上進之望兼非鼓舞人材之意向來月選之後原有九卿驗看之例引見之時朕又量材改調或補教職或令休致臨時自可區別毋庸預為揀擇著將新定會試榜發揀選之例停止嗣後惟令九卿秉公驗看詳慎去取勿

狗情面勿事姑容俟朕於引見時再加酌定自不使庸材濫司民社而吏治亦可收得人之效矣

又奉

諭旨三月會試已著為定例則殿試之期自應酌量變通著自今科為始於四月二十六日殿試五月初一日傳臚該部即通行曉諭知之

又奉

諭旨雍正五年會試榜發之後下第舉人曾蒙

皇考恩旨派出大臣檢閱落卷將其文理明通者各省取數十人再驗看人材年齒發往以教職補用朕即位以來亦曾舉行今科會試舉人較多往歲且積習一除士風丕變應加恩以示鼓勵著出榜後將落卷封貯該部請旨派出大臣秉公閱看選取發往各省畀以司鐸之任其有年逾八十以上者該部帶領引見朕將優惠也

又奉

諭旨國家設制科取士首重者在四書文蓋以六經精微盡於四子書設非讀書窮理而欲握管揮毫發先聖之義蘊不大相逕庭耶我

皇考有清真雅正之訓朕題貢院詩云言孔孟言大是難乃古今之通論非一人之臆說也近今士子以科名難以倖獲或故為艱深語或矜為俳儷詞爭長角勝風簷鎖院偶有得售彼此倣效為奪幟爭標良技不知文風日下有闕國家掄才大典非細故也古人論

文以渾金璞玉不雕不琢為比未有穿鑿支離可以傳世行遠者至於詩賦不免組織渲染亦必有真氣貫乎其中乃為佳作今四書文採綴詞華以示演博於孔孟立言相去萬里矣先正具在罔識遵循習俗難化職此之故嗣後令各省學政時時訓飭鄉會考官加意區別凡有乖於先輩大家理法者即擯棄不錄則詭遇之習可息士風還淳朕有厚望焉該部通行曉諭中外知之

又吏部帶領本年中式滿洲蒙古繙譯進士安福等十九員引

見分別錄用有差

十二年奉

諭旨向來鄉會試之年不准條陳科場事務蓋欲使士子潛心誦讀不便分更成例以擾其心且亦防弊之一端立法甚善夫三年之內何時不可言而必待場期已近紛紛陳奏耶孫宗溥摺交部暫存俟科場事

畢另行議奏嗣後如有似此違例條奏者必交部察議並傳諭科道等知之

又廣各直省鄉試錄科額數故事學臣科試之後復取遺才錄遺之後督撫又有大收取送甚濫是以議有科舉定額每舉人一名大省錄取八十名中省錄取六十名小省錄取五十名

上以前議但就正榜定額尚有副榜未經議及著再加恩准於每副榜一名大省加取四十名中省加取三十

名小省加取二十名令各學政於考試遺才時不
論生員貢監亦不拘縣分大小但就文理明通者
照數錄送入場

十三年奉

諭旨朕此次東巡加恩士類已令增廣入學名數復念
十三氏子孫遠承世緒濟濟膠庠其中當有文學可
觀讀書立品之彥宜加甄拔以廣恩施其令該學政
考驗其文行兼優者數人咨送禮部貢入成均示鼓

勵焉其引駕官孔繼汾朕看其人尚可造就著加恩
以內閣中書用

十五年定房考分經之法房考入闈照舊掣籤分
經其一經之內房考有籍同省者主考官臨時酌
量對調閱看他經

十六年奉

諭旨朕省方觀民南巡江浙羣黎士庶踴躍趨迎就瞻
恐後紳士以文字獻頌者載道接踵愛戴之忱有足

嘉者朕已疊沛恩膏隨時賞賚昔

皇祖聖祖仁皇帝時巡所至優獎士類一時碩學通才多

蒙

鑒拔方策所載稱盛事焉茲之于于而來皆棫樸作人久
道所貽也夫膠庠之秀志切近光其積學有素文采
穎異者加之甄錄良合於陳詩觀風育才造士之道
顧工拙既殊真贗錯出理應試之無使魚目砒砢得
混珠玉尋經分別考試派大臣閱卷進

呈取中人員准作舉人授為內閣中書學習行走其
原係進士者授內閣中書遇缺補用嗣是乾隆二
十二年二十七年三十年四十五年四十九年
南巡省方凡進獻詩賦人員皆考試選取錄用如之
又奉

諭旨庶吉士分習清書例由翰林院掌院學士分派惟
量其年力不拘省分舊時清漢各半自雍正年間以
來分習清書者漸少每科尚有十四五員十七八員

不等朕思邊省之人選館本少聲律亦素所未嫻既
習國書自必專意殫精惟清文是務非天分優而學
業勤者不能兼顧漢文日就荒落迨散館時或以清
書優等授職而留館後遇通行考試往往拙於詩賦
列入下等改令別用究其所肄清文自散館一試外
別無職分應用之處微獨邊省即此五省庶吉士類
然翰苑中江浙人員較多而遠省或致竟無一人者
非所以均教育而廣儲才也嗣後雲南貴州四川廣

東廣西等省庶吉士不必令習清書直隸山東河南
山西陝西等省亦視其人數若在三四員以上酌派
年力少壯者一二人其江浙等省人數在五六員以
上者酌派二三員率以三十歲以下者充之每科通
計在十人內外寧缺無濫循舉舊章備國朝典制足
矣該衙門即遵諭行

又奉

諭旨今歲恭逢

聖母皇太后六旬萬壽

慈福霑被海宇同之敬稽

皇祖聖祖仁皇帝萬壽特開鄉會恩科廣作人雅化蓋國
家遇大慶則必有殊常之恩朕思以紹顓俊之鴻規
溥承

歡之渥澤於壬申年舉行

萬壽恩科三月鄉試八月會試俾茲多士共樂觀光以昭
盛典該部即遵諭行

又奉

諭旨各省選拔貢生經朕降旨以十二年舉行一次計至癸酉年即屆選拔之期唯是來京朝考揀選引見劉監讀書或以知縣等官試用或以教職即用或以教職歸班序選條例屢經更定朕思選拔於數十百人中拔取一二人且不糊名易書可以驗其人才核其素行自當精擇以充其選應令該學政於試列前茅之士舉其文行兼優才品出衆者會同該督撫秉

公掄採以杜濫觴至庠序為陶育人材根本今教職
率多昏耄龍鍾濫竽應棧雖定以六年甄別而上官
以閒曹多方寬假非國家設官敷教本意應分以年
限詳加澄汰所遺員缺即以應授教職之選拔充補
於士風當有裨益所有選拔貢生赴部驗到作何定
限及朝考錄用一切規條俱應詳悉酌定永著為令
大學士九卿集議以聞尋議嗣後各該處復設教諭
并訓導各缺凡係月分推陞及別項事故出缺者

俱照定例銓選如係三年澄汰開缺者即將癸酉
年揀選引

見之拔貢照依

朝考名次先後充補其補授訓導者以教諭銜管訓
導事照依原銜陞轉俟揀選引

見之人用完即照舊例銓選從之

十七年奉

諭旨今歲

萬壽恩科各省計偕雲集而中額所收列有定數其下第
舉子中年力才具可以及時錄用者特予格外加恩
揀選引見分別以知縣試用教職銓補俾得早列仕
版目今巡幸塞外若俟回鑾再行揀選未免守候需
時著在京總理事務王大臣協辦大學士阿克敦尚
書舒赫德劉統勲孫嘉淦於會試揭曉後即行會同
揀選大省四十人中省三十人小省二十人俟朕回
鑾以次引見其年在七十以上難以復圖進取者並

著該部查明具奏候朕酌量加恩仍預行曉諭各舉
子知之

十八年奉

諭旨內廷行走之縣丞張宗蒼監生徐楊楊瑞蓮効力
皆已數年甚屬黽勉安靜張宗蒼年已及暮著加恩
賞給戶部額外主事徐楊楊瑞蓮著加恩賞給舉人
一體會試

又停止五經取中之例

十九年奉

諭旨場屋制義屢以清真雅正為訓前命方苞選錄四書文頒行皆取典重正大足為時文程式士子咸當知所宗尚矣而浮淺之士競向新奇即如今科於榜前傳首題文有用九迴腸之語者其出自漢書腸一日而九迴大率已莫能知不過勦襲纖巧謂合時尚豈所謂非法不道選言而出者乎不惟文體卑靡將使心術佻薄所關於士習者甚大朕曩云言孔孟言

大是難職是故也著將欽定四書文一部交禮部順天府存貯內簾令試官知衡文正鵠再策問時務用覘士子學識主試官不當以己見立說上年順天鄉試問黃河北行故道今春會試問黃河下流皆孫嘉淦陳世倌一己私見究亦空言無補若以此為去取將啓士子窺探迎合附和之弊其漸尤不可長即如宋元以來辨析朱陸異同初因講學而其後遂成門戶標榜攻擊甚為世道人心之害嗣後有似此者必

治其罪

又奉

諭旨會試榜後下第舉人歷科以來間有格外加恩之
典今科會試所有下第舉子亦著加恩於薦卷內選
取文理明通者驗看揀選帶領引見畀以司鐸之任
其奏請簡派大臣閱卷驗看及按省酌定員數分班
選用之處該部察例具奏至年七十以上者並著該
部帶領引見酌量給與職銜

又定考取國子監學正學錄例山東道御史陳大
化奏國子監學正學錄等官請照內閣中書之例
考取錄用從之

皇朝文獻通考卷五十

欽定四庫全書

皇朝文獻通考卷五十一

選舉考五

舉士

乾隆二十一年清順天鄉會試冒籍之弊陝西道
監察御史陳慶升奏順天鄉試及會試冒籍考中
並出仕者俱准改歸本姓原籍該學政遇考試之
期嚴查辦理以清籍貫一摺奉

諭旨此奏大有闢乎士習人心著大學士會同九卿一併詳議具奏尋議北皿北貝字號中式之舉人內有南人冒捐北監及冒入北貝者於填寫親供時俱自行首明更正勒令改歸原籍報明禮部如不早自首別經發覺即照例斥革再該御史所奏今科冒籍順天中式舉人李駿等三十一人已經訪知確有本姓本籍僅令首明改歸原籍實不足以示懲應將李駿等三十一人並今科之首明冒籍舉

人俱罰停會試一科以儆冒濫其現在翰林中薛
田玉之榜名田玉等皆係久經中式應改歸原籍
之人內除業經首明改歸江南原籍之人員外將
翰林院編修丁田樹與以罰俸處分至該御史單
開本科中式舉人三十一人之父兄身係職官者
於子弟冒籍不能覺察亦屬不合均照違令笞五
十公罪律罰俸九個月至從前各科南人冒捐北
監冒入北貝中式之舉人進士令其首明咨回本

籍倘踰限不行呈改照例斥革議處其冒籍未經
中式之貢監生員一體辦理得

旨允行

又奉

諭向例各省鄉試硃墨卷解送到部即派翰詹坊局以
上及京堂科道等公同磨勘所以慎重科場稽查弊
竇典至重也其磨勘諸臣不過按數按省分閱若不
於卷面註明某官某人磨勘字樣以專責成則已經

夾簽者尚知為某人摘出其未經夾簽者或不過虛
應故事陽博寬厚之名陰省校閱之煩而盡心乃事
者反不無觀望殊失磨勘本意此朕偶因問陳世倌
磨勘事而思及者然不戒視成朕所不為著以下科
為始磨勘諸卷俱於卷面填寫銜名俟該部彙卷後
朕另派人於每束內量取數卷特交大臣再詳加校
勘呈覽朕仍於此中復行抽閱如有草率從事者即
交部照例分別議處則磨勘各官及特派大臣之是

否詳慎均難逃朕之洞鑒矣著為例

又奉

諭旨鄉試磨勘一事前已有旨令於下科為始將來詳加覆勘自不致視為具文惟是三場試藝篇幅繁多士子風簷寸晷中檢點偶疎輒干指摘其以磨勘獲咎者轉得有所藉口且設科立法程材無取繁文虛設一士子論表判策不過雷同勦說而閱卷者亦止以書藝為重即經文亦不甚留意衡文取士之謂何

此甚無謂也三場試以書藝經文足覘素養繼之五策更可考其抱負之淺深又何庸連篇累牘為耶嗣後鄉試第一場止試以書文三篇第二場經文四篇第三場策五道其論表判概行刪省至會試則既以名列賢書且將拔其尤者備明廷制作之選淹長爾雅斯為通才其第二場經文之外加試表文一道即以明春會試為始鄉試以乾隆己卯科為始著為例如此則士子闡中不得復諉之於目力不給而主試

者亦可從容盡心詳校無魚目砒砒之混且鄉試第二場止經文四篇斯潦草完篇者當在所黜專經之士得抒夙學淺陋者亦知所奮勵去浮文而求實效斯足稱國家賓興大典可傳諭該部遵行再向來會試例不磨勘未足昭慎重亦著寬至庚辰春榜後奏請一體派員磨勘

二十二年奉

諭旨前經降旨鄉試第二場止試以經文四篇而會試

則加表文一道良以士子名列賢書將備明廷制作之選聲韻對偶自宜留心研究也今思表文篇幅稍長難以責之風簷寸晷而其中一定字面或偶有錯誤輒干貼例未免仍費檢點且時事謝賀每科所擬不過數題在淹雅之士尚多出於夙構而倩代強記以圖僥倖者更無論矣究非核實拔真之道嗣後會試第二場表文可易以五言八韻唐律一首夫詩雖易學而難工然宋之司馬光尚自謂不能四六故有

能賦詩而不能作表之人斷無表文華贍可觀而轉不能成五字試帖者況篇什既簡司試事者得從容校閱其工拙尤為易見其即以本年丁丑科會試為始現在各省會試舉子將已陸續抵京該部即通行曉諭知之旋以邊方北省聲律未諧驟押官韻恐不能合有司程式

諭主考及分校各官今科各就省分酌量節取不必繩以一律至下科會試時則三年之功自宜研熟不妨

嚴其去取

又禮部議順天府府尹劉綸等奏大宛兩縣冒籍
貢監一疏奉

諭旨依議此等捐納貢監其因應試投捐者乃圖獵取
科名冒占試額自當從嚴辦理然例由國子監分堂
肄業或由學政錄科其為數不過數百人年貌語音
不難立辨嗣後應專其責成務令於肄業錄科時嚴
加察驗以杜假冒倘仍前濫行收考一經發覺必將

錄送各官嚴加議處至不應試之貢監第希頂帶之
榮或由以捐納官職自與玷冒科名有關政體者殊
異若必如前議限年令自改回籍違皆斥革及如該
府尹所奏由該縣具結赴部始准收捐轉致胥役藉
端需索種種過甚勿如聽其捐納為便

二十三年奉

諭旨滿洲蒙古現任三品以上大臣之子孫及親兄弟
子姪有應試者俱令自行奏聞必國語騎射皆有可

觀方准入場考試並照鄉試之例請派監試御史及
監場都統各員前往彈壓

又議准鄉會試第一場四書文外仍加試性理論
一篇

二十五年禮部議兵部侍郎錢汝誠條奏磨勘試
卷內除直書

廟諱

御名

先師諱及失格違禁真草不全五策悞寫題目者仍
照不諳禁例罰停會試三科其行款偶悞字面違
式者罰停會試一科應照所請纂入則例再順天
等五省試卷內有

御纂字樣未經三臺業經奏准罰停會試三科應否一併
改為罰停會試一科之處恭候

欽定一疏奉

諭旨依議磨勘順天等五省臺寫不合試卷著一體准

其改為罰停一科

又奉

諭旨廷試士子為掄才大典向來讀卷諸臣率多偏重
書法而於策文則惟取其中無疵類不礙充選而已
敷奏以言特為拜獻先資而就文與字較則對策自
重於書法如果文義醇茂字畫端楷自屬文字兼優
固為及格之選若其人繕錄不能甚工字在丙而文
在甲者以視文字均屬乙等可以調停入彀之人自

當使之出一頭地況此日字學稍疎將來如與館選
何難臨池學習倘專以此為進退兼恐讀卷官有素
識貢士筆跡者轉以藉口滋弊非射策決科本義也
現在定例擬選十卷進呈須俟引見始定名次決科
衡文尚待觀人而閱卷時竟先抑文重字可乎又向
來讀卷官雖例不回寓然皆各覓公所散住地非鎖
院人得自由在監試王公大臣等既不能各分一員
同居糾察而讀卷諸臣從容退息亦何不可遣人回

家潛通消息此而置之不問則凡鄉會試之設法闕防又何取焉且試策不過一二百卷以十四人公閱即一二日亦可竣事乃遲之三五日始行進呈晨集暮散展轉需時於形跡尤為未協著大學士九卿將嗣後讀卷官如何叅覈文字務令取擇適中並作何住居監察刻期竣事之處一併詳悉議奏尋議得本年

殿試奉

諭旨令於傳臚前一日將擬定十卷進

呈即於本日帶領引

見詳覈文品始定名次

臨軒策士本欲得明體達用文義醇茂之卷拔置上第
以備他日之用而讀卷諸臣向因原卷進

呈未免兼擇其書寫精工者始行充選行之既久轉
若嚴於字跡而寬於文格夫點畫粗工可以弋獲
而文詞醇茂或且見遺非所以示權衡之準得輕

重之宜也應遵奉

諭旨叅覈文字務令取擇適中除條對精詳楷法莊雅
者盡登上選外其有繕錄不能甚工而援据典確
曉暢時務即為有體有用之才亦應列為上卷若
對策敷衍成文全無根據即書法可觀亦不得充
選進

呈請於

文華殿兩廊並

傳心殿之前後房間令讀卷官及監察之王公大臣
科道收掌等官一同住宿舊例讀卷用十四人未
免過多應請量行裁減派用八員內

欽簡大學士二員其餘六員照會試總裁之例將應行
開列人員請

旨欽點以兩日閱卷第三日進

呈帶領擬定十卷貢士引

見刻期竣事不致輾轉需時既杜形跡之嫌而於衡校

益見肅清矣從之

又奉

諭旨據鞠愷奏粵西省內應試生童多有他省人冒籍
現在嚴行查辦等語該省地處偏隅嚮學者少他省
人士未免乘機混名冒考但自乾隆三年部議停止
外省及本省異府人入籍之例司學政者自應嚴為
禁飭何以尚多混行冒試者此歷任學臣不能查察
所致著該部查明乾隆三年以後所有廣西學臣照

例議處再此等冒考弊竇在江浙等處尚少他如雲貴川廣偏僻州縣文風稍陋他省人或因父兄作幕或因親友貿易遂爾乘便混考皆所不免并著各該學政留心查察毋使滋弊

定主考同考意見不同闈中閱卷處分例禮部議侍郎觀保奏鄉會試同考官黜落之卷主考官公同研核如實係可中之卷仍行取中磨勘時有干例議專生主考倘所搜之卷允當即將同考官嚴

加議處應如所請從之

又奉

諭旨鄉會磨勘試卷蓋以防弊竇正文風所關綦重前
經降旨飭部定議實力奉行司事者勸懲既明持衡
者去取自慎其有剽竊支離穿鑿險僻希心詭遇之
士諒不敢濫登選格自取糾彈第矯枉無取失中而
掄才務崇大體經義之制原以見理明通措詞爾雅
為正果能理明詞達有大醇而無小疵固稱上選若

其學識才情大端確有可取即一二字句失檢無妨
棄瑕採錄蓋風簷寸晷中一日校藝即在學問優通
者亦不能必無疵類要不足為全璧之玷也為考官
者倘意在求免吏議因而吹求擯棄轉謂平庸膚淺
之文似是而非無可指摘遂致燕石冒玉魚目混珠
則所云救弊適以滋弊殊非慎重磨勘本意嗣後鄉
會典試諸臣務擇清真雅正文藝兼優之作為多士
準繩不得因磨勘周詳反以庸才塞責更不得因有

此旨藉口瑕瑜不掩以致怠忽從事負朕崇實黜浮至意將此通行傳諭知之

又奉

諭旨學政馮成修奏考試事宜一摺所見明昧各半朕明斥其非然亦不棄其是如馮成修所稱試題不宜割截牽搭一條據其所列各省出過諸題則實係不顧文理強為湊合非惟難核真才抑且大悖經義非取士之道即所奏童試取進文卷請免解部磨勘雖

不免有自為張本之意第童試之文不能皆有醇無疵且一學政所取合計通省不下數千卷原非鄉會硃墨卷應行磨勘可比此二條尚不為無見若鄉試及歲科兩試皆免試詩帖則其說已自相矛盾前因科場表判多涉雷同勦竊陋套是以改試排律使士子各出心裁若以詩為僅尚詞華則前此表判獨非駢體乎試問表判之詞華較排律之詞華孰難孰易若如馮成修之議去詩則將仍為表判乎否乎將仍

表判盜襲之風為是乎此論之必不可通者至考試
武生請復用四書論題一條所稱讀書明理乃能宣
猷閭外等語尤屬誕謬武科一項不過舊制相沿因
仍不廢若論我國家用兵自開創以來暨近日平準
夷蕩回部皆我滿洲及索倫勇將健卒折衝萬里戴
成大功綠營兵尚無所用更何嘗恃武科出身之人
而藉其干城腹心之寄耶至侈談昇平羽林棄武尚
文諸論此不過見之詩歌寄興尚可其實文恬武嬉

宴安酖毒為國家之大害朕必不出此而我子孫萬
世所當奉為家法永為深戒馮成修或別有深見欲
為嘗試乎從前明季陋習每遇一事舉朝各挾意見
議論紛然其時人主皆漫不省視是以諸臣得遇事
生風紛呶嗾沓甚至借建白之名黨援門戶無所不
至究於國是毫無裨益朕於內外章奏何一不親覽
而肯令此風稍啟其漸耶馮成修識見卑詐如此不
可仍令司鐸著開缺來京供職其尚可行二條下該

部議行

二十六年大學士蔣溥奏考取內閣漢中書請於
會試薦卷中文理尚屬明通詩律亦能穩妥者照
上次額數另取中書一榜揭曉後照例帶領引

見定奪挨次選用如逢應取明通榜之年更於中書外
照例選取從之

又定國子監教習期滿引

見例舊例國子監教習人員分別一二等引

見其一等留學三年例以知縣即用遇有挑選例得赴
挑至是遵

旨定議嗣後三年期滿出具考語帶領引

見恭候

欽定毋庸分別等第亦毋庸留學三年俱令歸班候選
從之

又奉

諭旨乾隆十七年壬申恭遇

聖母皇太后六旬萬壽恩科曾經格外加恩於下第舉子
中揀選引見量予錄用其年在七十以上者並分別
賞給職銜本年恭遇

皇太后七旬萬壽數天同慶特開

萬壽恩科所有未經入彀舉子應照前例一體加恩按其
科分名次先後為序派出大臣詳慎揀選分別以知
縣試用教職銓補不得專取年少新科之人充數並
著軍機大臣會同該部查明應試舉子中有年在七

八十以上者於揭曉後列名具奏候朕加恩降旨以普

慈惠而光盛典旋禮部於揭曉後查明八十以上之李勉等七人俱著賞給翰林院檢討職銜七十以上之盛大業等十九人俱著賞給國子監學正職銜又奉

諭旨廷試為策士鉅典上年因朱嵒條奏令讀卷官會集文華殿悉心較閱其制已為周備惟是增派王公

大臣及御史等監試一節在讀卷諸臣有事讀卷而
監者終日坐視此不過防其爭執把持耳然各人意
見時有不同勢難禁其折中商確亦無取其同聲附
和也若云把持獨斷則今日尚覺鮮有其事即果有
之亦非監試數人所能盡察諸事朕惟務實有名無
實不如不為自後王公大臣御史均毋庸如朱崧所
云增派因思諸臣讀卷向俱各加圈點分別標識其
間即各有參差不過如上之適中中之適下品題不

無互見當不至相去懸絕其或相去懸絕者必各存成見有高下其手之弊應自本科為始俟傳臚事竣禮部即將讀過試卷請旨另派大臣覆行察看如有標識懸絕者即行簡明進呈候旨庶諸臣不敢稍以私意抑揚鑑別益昭公慎又讀卷官所進策目問條向有由內閣預擬之陋例漏洩揣摩不可不防其弊應一概禁止屆期令讀卷官密擬策問進呈候朕裁定發齋刊刻著為令嗣於二十八年四月定進

呈十卷不必預拆彌封候

欽定後再行傳齊按名引

見

三十年奉

諭旨前經降旨八旗三品以上子弟遇考試之期其父兄自行奏明原因八旗淳樸素風恐其艷心詭遇是以示之節制俾知崇實黜華非概從禁制遏其進取之途也乃邇年來八旗大臣竟無奏請子弟應試者

我國家滿洲世臣宣力贊政者多不藉文章一途但承平百餘年滿洲詞臣文藻黻飾亦不可少大臣子弟中果能於國語騎射之外兼習文藝者仍准一體入闈毋庸奏明請旨

又奉

諭旨科場取士原以文體為重士子作為制藝惟當根柢經史發揮義理一以清真雅正為宗自不致動多瑕類磨勘官遇試卷中詞句多疵者自應逐一簽出

按例議處至科場禁例凡遇

廟諱字面理應恪遵敬避如有違錯自難貸其處分若擡頭小悞既無關於獎竇且於文體無妨而條例所定字樣甚多如必斷斷較量曲為指摘何異吹毛求疵況擡頭格式本無一定即詞臣所進詩文尚有不能悉合朕亦從不計較又豈肯於草茅下士風簷寸晷中過為苛責乎又如貼例內有填寫添註塗改字數等語其於立法防弊亦所謂不揣其本而齊其末所

有條例內應加刪正之處著大學士會同該部議行
尋議舉子行文恭遇擡頭頂格非係

廟諱

御名

至聖諱及例載

列聖

郊

社

宗廟

皇上各實寫字樣偶失檢點誤作單擡概予免議又試卷內塗改添注字數各於卷尾填明之例一併停止從之

又酌定科場事宜御史戈濤條陳科場事宜四事一府尹監臨順天鄉試宜駐場終事一貼例字畫小差擡頭雙單小誤添注塗改小不如式量從寬宥一科舉應試驗文宜行裁革部議應如所請得

旨允行

三十一年奉

諭旨知貢舉等奏稱謄錄所燭煤失落燒損墨卷五十
二本俱不堪謄送內簾等語舉子跋涉觀光業經竣
事而試藝不獲送閱選情甚可憫著將被燒各卷
其如何加恩俾伊等文字得以一體補謄送閱不致
獨抱向隅之處查明辦理尋議就中燒去邊幅及損
缺一二百字者三十四本令本人仍照原卷謄校

不得改竄燒燬零落者十八本應行另試於三月二十四日赴

圓明園恭請四書題二道與校謄原卷之三十四人分別隔坐將各卷交知貢舉一體彌封發謄從之又奉

諭旨向來新進士殿試朝考後復派王大臣驗別等第原因人文並重且使遠省之名次在後者亦得均與館選也但新進士通行引見其人之可造與否朕皆

臨時甄錄自可無庸預為揀選嗣後著各按省分仍依甲第前後分班帶領並將上次每省錄用人數詳悉開呈其朝考錄取者并注明於綠頭牌及排單內

三十三年令在京各衙門揀選開列試差人員

諭今年鄉試應考開列試差人員已降旨令該部帶領引見但此次既停其考試則應開人員為數衆多其中間有年力就衰學殖荒落者若令概行開送恐不足副衡文之任著該衙門於合例人員內即速揀選

送吏部帶領引見

又議定鄉試卷鈐用關防並開寫履歷併歸畫一
先是各省鄉試硃卷有用監臨官關防者有用布
政司印信者有竟無鈐用印信關防者殊未畫一
嗣後各省鄉試硃卷照順天鄉試及會試之例於
硃卷接縫處鈐用彌封官土紅色關防其各省墨
卷首頁開寫履歷亦應照順天鄉試之例書寫某
生應乾隆某年某省鄉試字樣

又議定中書以進士舉人輪用事宜吏部准御史
蔣曰綸疏稱中書一官向來為舉人進士兩項進
身之路而其職掌專以字畫工楷為重請將

朝考錄取未經

簡用之卷及會試薦卷內硃墨各卷一併奏請

欽派大臣彙總校閱擇其文字俱優者分別名單帶領
引

見恭候

欽定記名交部按照名次進士舉人相間輪用從之

又

諭嗣後校對順天闈墨筆跡不必另請派人即着派出

大臣磨勘時一併校對

又

諭前曾降旨令順天鄉試同考官南省人迴避南四卷
北省人迴避北四卷邊省人迴避中四卷滿洲漢軍
迴避滿洲合字卷所以防弊竇而慎掄才顧行之未

久旋經給事中吳煒條奏停止今御史王猷奏請順
天鄉試房考閱卷仍應迴避所見甚是南北中皿雖
總數省合編究之本籍人多或同鄉戚友適分入本
房難保無暗為照應之事況鄉會試事同一例會試
房考閱卷既迴避本省鄉試何獨不當迴避本籍乎
取士大典所關綦重不可不杜漸防微以遠嫌疑而
矢公明於考官士子均為有益嗣後順天鄉試並仍
照乾隆六年所降諭旨行著為令

又令新中舉人照順天鄉試例依限赴學政衙門
填寫親供時即令默寫首藝七八行一同封固送
部辦理

又令主考官遵照定例於落卷中盡數搜閱其中
有無取中於奏報試竣摺內聲明

又申定順天副榜取中額數定例副榜中額每正
榜五名取中一名如不足五名不准取中順天鄉
試應分別滿合南四北四北貝等字號核計各號

正榜之數照每舉人五名取中一名以歸畫一至
夾旦中四三號合算取中副榜之處查夾旦二號
每號額中舉人四名中四字號額中一二三名不
等均不足五名之數應照例毋庸取中再各字號
舉人中額滿字二十七名合字十二名北貝一百
二名南北四各三十八名今副榜亦分字號取中
除每舉人五名取中副榜一名外各號俱有奇零
亦應照不足五名之例毋庸核算取中

又奉

諭昨據順天府奏本年鄉試取中美二十號硃卷悞將
美十二號吳嗣德名姓填寫發榜後請將吳嗣德除
名其美二十號之卷毋庸議吳嗣德既係悞中自應
於榜內除名至原取中美二十號之朱鈐著加恩准
作舉人

三十四年

諭禮部奏請磨勘官照例議叙之處尚未允協從前定

例原為其實能詳慎從事秉公糾舉者而言若僅隨班塞責而於卷內全無簽摘亦得倖邀叙錄不足以示獎勵著詳悉定議具奏嗣經軍機大臣等會議得嗣後磨勘鄉試會試卷各官全無簽摘及簽摘不當塞責了事者概不准予議叙如磨勘官果能秉公糾舉經覆勘大臣校勘俱各允當奏准

鑒定者事竣後禮部移咨吏部議叙准其紀錄一次若奉

特旨交部議叙者准其加一級從之

又

諭昨派閱朝考卷之大臣以擬取各卷進呈朕閱前列
數卷并拆開彌封則擬列第一之嚴本卷論冒云人
心本渾然也而要必嚴辨於動靜之殊兩句內姓名
顯然併見復閱擬第二卷之王世維卷則云維皇降
衷而擬第三卷之鮑之鍾則用包含上下包為鮑字
之半擬第五卷之程沅則云成之者性也成與程音

相同實堪詫異雖文義原屬可取而字跡可疑且不止一卷豈得盡謂偶然適合似此隱藏字樣非關節而何若謂此非關節不解有何等字樣為關節者朕從不肯逆詐億不信而亦斷不能漠然無先覺為此等伎倆所蒙諸臣皆朕所信任派出不值因此遽興大獄今為一一舉出應有內愧於心者耳此事姑從寬免究將此明白宣示俾嗣後衡文諸臣及應試士子各自猛省倍加警惕

又禁臨場私改所習經書時因湖北巡撫查訊新
中舉人李桃張汝弼潘德化胡薰四名臨場私改
經書照違

制律杖一百草去舉人嗣後凡遇鄉試之年各直省
學政造送錄科錄遺等冊均照順天鄉試之例將
年貌籍貫經書註明移送布政使交該收掌官於
投卷時詳加核對倘有不符不准收卷仍將底冊
移送提調監試等官查核以杜臨場私改經書之

獎

三十五年奉

旨開

萬壽恩科

諭國家茂膺多福瑞祉駢臻思與海內同茲嘉慶粵在
壬申辛巳兩遇

慶典再開

萬壽恩科今年為朕六十誕辰明年恭逢

皇太后八旬萬壽仰惟

慈禧光被歡洽敷天允宜申錫無疆彙征叶吉用彰行慶
作人之盛著於本年八月舉行恩科鄉試來歲三月
舉行會試俾多士忭舞觀光副朕錫類延

釐至意

臣等謹按是科為始凡鄉試八十以上會試七十
以上者各督撫暨禮部查明具奏俱蒙

賞給舉人并檢討學正職銜有差自是耆年宿學得沐

恩榮作人之盛有加無已其詳見養老門內茲不贅焉

又

諭順天府進呈恩科鄉試錄內有中式舉人名姓與已故尚書張照全同者其人籍隸宣化見聞僻陋偶然適合亦未可知但張照係舊日大臣且其學問字法近所罕有豈新進後生所能幾及又旗人有名乾元者不知此二字著於易義豈臣下所宜命名均著禮部查明即行更名註冊

又酌議直省外簾等官直省外簾受卷等四所事竣即陸續出闈收掌試卷官有始終經理之責該督撫於事簡同知通判內不必拘定科甲遴調入闈仍於揭曉後出闈嗣江寧等處布政使姚成烈奏請減江南外簾官之處查江南外簾官增至二十員未免浮多應照順天十八員之例減去五員以符體制

又停貢監生員改習經書先是士子改經雖任從

其便而在臨場則例綦嚴茲因廣西學政童鳳三
查出今科中式舉人朱一沛臨場私改經書奏
聞辦理並稱士子呈改經書非本經荒蕪即妄思僥倖
請嗣後舉貢生監改經之例永行停止其新捐貢
監及新進各生皆以初次進場錄科冊註習某經
為定如有私行改經等情察出照例斥革從之
三十六年酌減

殿試執事官員等事宜禮部奏請向例

殿試應用監試御史四員受卷官十員彌封官十二員收掌官四員印卷官四員填榜官十八員共五十二員由臣部於內閣翰林院都察院等衙門題請

簡用但受卷彌封事不甚繁應將受卷官改為四員彌封官改為六員印卷官改為二員填榜官書寫清漢字樣改為十二員於應辦事宜足敷經理至各項執事內有應用臣部筆帖式者向例一併開入

嗣後交與臣等屆期酌量委用無庸一體開列以符體制從之

又嚴禁謄錄對讀選充不慎及僱替等弊國子監祭酒張裕華奏請查向例謄錄書手係各州縣解送對讀生員係教官解送若選充不慎有僱替充數即將該員照例叅處各役本身并僱替之人照例究治從之

又頒發直省貢院書籍先是直省鄉闈惟順天鎮

有

欽頒書籍而江南等省尚沿用舊存坊本嗣經議准御史趙鏌條奏頒發各省

御纂

欽定經史詩文各書及十三經註疏文獻通考史記前後漢書各部俾闡中主考房考各官臨場用資緘閱以正向來坊本沿訛之弊從之

又更定內外簾用藍筆禮部議覆署雲南巡撫諾

穆親奏請內外簾所用藍筆應行改定嗣後正副
考官仍用墨筆謄錄書手仍用硃筆外內簾自房
考內監試及內收掌官外簾自監臨提調監試及
受卷彌封謄錄對讀收掌等官均改用紫筆其原
用紫筆之對讀生改用赭黃筆即於本年

萬壽恩科會試為始從之

臣等謹按是年九月因御史興德奏請申明前議
嗣後對讀所官除文移冊檔用紫筆外其於改正

硃卷字樣之處如有悞用紫筆者令監臨知貢舉
及監試等官查叅議處又議准鄉會試卷尾印卷
戳記及一切應用藍色之處俱改用紫色以歸畫

一

又考試山東進獻詩賦諸生奉

諭此次山東省考試諸生各賞緞一疋

又

諭此次考試山東省進獻詩賦之生員初彭齡監生甯

汝翼俱著加恩賞給舉人准其一體會試

又

諭今日讀卷諸臣將擬定十卷進呈閱其文詞頗多規
少且有語涉瑞應朕意深為不取現就各卷中擇其
立言稍知體段不致過事鋪張者拔列前茅其措詞
近浮及引用失當之卷酌量抑置以昭激勸將此通
行曉諭知之

又議定

朝考散館等考試止限排律一首御史張霽奏請鄉
會科場例限排律詩一首近科新進士

朝考於

欽命詩題有賦至二首或三四首者應令遵照制科定
式毋許示異矜竒此外如庶常散館翰林大考以
及考試試差嗣後亦均不得違例多作以肅成規
而符體制從之

又

諭今歲恭逢

聖母皇太后八旬萬壽特開鄉會恩科俾懽洽彙征永為
例事其年臻耄耋者業於今春榜後視其齒序恩予
職銜

壽宇覃釐用徵士林嘉瑞而雲集觀光之衆亦當令其同
霑

慶澤益廣

慈禧著於明歲春闈後仍照丙戌年之例將應試舉人分

別等第揀選引見錄用俾得乘時筮仕以示振興並
彰錫類作人之至意

又議定鄉會試派出大臣隨帶官員從人名數御
史禔克濟等奏請鄉試派出搜檢大臣等應帶官
役人數未經著有明條應請嗣後派往貢院搜檢
之王公等進磚門時隨帶官員不得過三員從人
不得過四名各部院八旗大臣等隨帶官員不得
過二員從人不得過三名仍預期將各職銜姓名

造具清冊移送外場巡察御史臨期按照名數查
明放入再龍門內稽查接談換卷等弊之大臣及
會試鈐榜之禮部堂官順天鄉試鈐榜之府尹隨
帶官役並請照搜檢各大臣之例以歸畫一從之
禁策問不得連及

本朝臣子並不得過三百字議准左都御史張若桂
奏請近科策問有尚論古人連類及於

本朝臣子抑之則近於攻訐揚之則涉於黨同嗣後

鄉會試發策不得以

本朝臣子學問人品策問士子士子對策中亦不得
泛引涉及違者聽磨勘大臣舉奏分別議處至策
題每問至五六百字之多空疎者不難就題易移
點竄成篇應申明定例嗣後策問每道俱不得逾
三百字之數倘有逾額冗長者將該考官叅奏
又酌議滇省鄉試同考官並增減經書房數議准
署雲南巡撫諾穆親奏請鄉試內簾同考官有分

校呈薦之責原應慎擇充選惟是滇省現任之員
為數較少而每年運銅差委較他省為多不敷考
選現在委署正印人員與閒居省會聲氣易通者
有異入闈襄事亦可無虞滋弊嗣後該省鄉試同
考官照例於科目出身之現任州縣同知通判內
調取外如有不敷即將現在委署州縣以上人員
一體考充其非現在委署及借補縣丞等官仍照
定例概不准入內簾以昭慎重再滇省同考八房

內詩書各二房而屢科詩經約有一千五六百卷
書經僅五百餘卷多寡迥別應將該省書經裁去
一房詩經加增一房定為三房從之

三十七年

諭前於乾隆三十一年丙戌科會試降旨分別挑選各
省舉人以疏壅滯閱今已逾六載業經加恩降旨於
本年春闈後照例舉行但思前次挑選所有新中舉
人不應遽行入選者止扣除切近兩科而王大臣等

驗看多取年力精壯之人是入選者仍係近科舉子
為多其科分較陳者仍致艱於預列豈朕設法疏通
本意自應再為參酌使官人造士並得其中方為允
協今計切近兩科如庚寅辛卯年分竟與本年直接
即推溯至戊子乙酉兩科距今亦不過五年七年舉
子半屬年富力強較之乾隆初年舉人懸隔三十餘
年者相去霄壤概予甄錄甚非情理之平此次挑選
者將乙酉戊子庚寅辛卯四科舉人均行扣除至王

大臣等就應挑舉人內量其科深而人才出色者列入一等以備分發各省試用科深而才力不至近衰堪勝司鐸者列入二等以教職銓補俱引見候旨定奪其按省酌定人數照上屆例此朕愛惜士子慎重官方不得已調劑之苦心該部即遵諭行嗣經吏部奏准此次大挑據禮部查覆會試舉人在壬午科以前者共二千四百八十九名各省人數多寡不齊若大中小省分別核計難以適均臣等悉心籌

酌請照截取舉人分別遠近省之例近省直隸江
南山東山西河南陝甘浙江江西湖北挑取十分
之五遠省四川廣東廣西福建湖南貴州雲南挑
取十分之六約計一千三百餘名謹將各省人數
酌定應挑數目開列清單恭

呈

御覽至其入選之員無論遠近省分俱酌取一等四分
二等六分臣部將列在一等者帶領引

見恭候

欽定二等各員開列清單另行奏

聞註冊銓選悉照上屆之例從之

又

諭今日禮部奏會試磨勘試卷請將簽摘允當之原勘
官照例議叙至以原勘遺漏之員交部察議而置全
無簽摘之員於不問定例殊未允協嗣後凡原勘官
已經簽出者雖覆勘另有增易毋庸復行交議至各

員內有派辦兩科並未簽摘一卷則其人全不以事為事疎漏實所難辭照例予以處分庶足示儆所有此次會試磨勘無簽各員著該部存記俟下科磨勘時彙核查辦如此准情定例則功過皆得其平而公事亦益昭詳慎著為令

又吏部將錄取

朝考未用人員及會試薦卷內挑取舉人等帶領引見奉

旨李蔡等三十人以內閣中書用劉景岳等十人以學

正學錄用

三十八年

諭此次天津召試一等生員顧瑬李廷敬貢生閔思毅
陸伯焜賞給舉人舉人杜兆基以內閣中書用列在二等
之進士張虎拜舉人張方理等六人生員陸蓉三人
貢監生邱人龍四人俱賞緞二疋

四十年禁鄉試題不得割裂牽搭禮部議覆程景

伊條奏禁止鄉試考官出題割裂小巧嗣後如有
似此命題者將考官議處從之

臣等謹按時因四川省出題牽連無理正副考官
並行議處

又

諭據派出驗看本年八旗會試舉人騎射王大臣等奏
稱應行考試者一百二十五人內報近視眼者七十
三人已揀令二十人照常騎射外其餘實屬不能之

五十三人俱未令其騎射等語馬步騎射旗人根本
即讀書人亦不可不學今考試者一百二十餘人內
報近視眼者竟有七十餘人之多明係捏報希圖規
避嗣後考試內若有似此不能騎射者俱著停其考
試著為例

臣等謹按是年不能騎射之五十三人已停其考
試嗣後即著為令

又議草除鄉會試經頭名目先是鄉會試入場有

經頭名目雖載在條例令報明該衙門驗准取結
押送入場但此項既非州縣書手每科存此名目
不免有藉端包攬滋弊之處且與舊例選取總書
之語不符今御史孟邵奏請永行革除嗣後辦理
科場照舊例令地方官選送誠實書手正身入場
分撥四所仍就其中擇誠謹明白者每十名選取
總書一名亦令籤掣各經分司其事總於場內臨
時酌定自不致有先期請託之情弊並請會試交

知貢舉提調鄉試交監臨提調同至公堂御史一體稽查從之

又議禁考試官不得向家中索取什物山東道監察御史穆隆阿疏奏三年考試為

國家掄才大典必須闢防嚴密杜絕弊端方可收取真才向來值場中間卷之時凡考試官員向家中取送什物例無明禁請嗣後初八日舉子進場完畢後凡考試各官不得仍向家中索取什物并請

交稽察外場御史如遇有考試各官自家中送到什物即全行駁回不准放進從之

四十年

諭御史孟邵奏會試磨勘簽出應議之許士煌一卷原係詩三房李殿圖呈薦經主考取中撥入詩四房白麟名下今白麟固應照例處分其原薦之房考轉得置身局外似覺偏枯請敕部釐定處分以昭平允朕初聞之下以其言為近理及詢大學士于敏中奏稱

向例撥房之卷原儘受撥之房考覆閱必其文果當
意方交內監試改用薦條如不願受撥主考官亦不
能相強改撥之卷即由受撥房考閱定方換薦條即
與本房呈薦無異且聽其自擇並非主考所能抑勒
無虞滋弊至受撥以後即認該房考為房師與原薦
之房無涉則功過皆當任之遇有處分乃所應得更
不得謂之偏枯孟邵此奏不必行

皇朝文獻通考卷五十一